



Šemsudin Mehmedović

Broj: 01- /26

Sarajevo: 19. 2. 2026. godine



PRIMLJENO: 19. 02. 2026			
Organizaciona jedinica	Klasifikaciona oznaka	Redni broj	Broj priloga
01/18-50-1-602		1	20

**KOMISIJA ZA BORBU PROTIV KORUPCIJE  
PREDSTAVNIČKOG DOMA  
PARLAMENTARNE SKUPŠTINE BOSNE I HERCEGOVINE**

**Predmet:** Inicijativa za ispitivanje nepravilnosti u radu Kolegija Sekretarijata Parlamentarne skupštine Bosne i Hercegovine – neodgovaranje na zastupnička pitanja, izmjene Pravilnika o sistematizaciji i povećan broj izvršilaca, zloupotreba diskrecionog prava rukovodilaca s ciljem pogodovanja bliskim osobama pri dodijeli stimulacija, odluka o službenim putovanjima, imenovanjima u radne grupe za koje se dodijeljuju novčane naknade i sl.

**I Uvod**

U posljednja tri mjeseca dobio sam više anonimnih prijava od zaposlenih u Sekretarijatu Parlamentarne skupštine Bosne i Hercegovine (u daljnjem tekstu: Sekretarijat) u kojima je ukazano na brojne nezakonitosti i nepravilnosti u Sekretarijatu. **Kao državni zastupnik dužan sam da, u skladu s Poslovníkom Predstavničkog doma (u daljnjem tekstu: Poslovník) i Zakonom o parlamentarnom nadzoru, insistiram na zakonitom radu institucija,** te sam u skladu s Poslovníkom Predstavničkog doma podnio Prijedlog za osnivanje Istražne komisije Predstavničkog doma za utvrđivanje nezakonitosti u radu Kolegija Sekretarijata Parlamentarne skupštine Bosne i Hercegovine (u daljnjem tekstu: Kolegij Sekretarijata).

Predstavnički dom Parlamentarne skupštine Bosne i Hercegovine (u daljnjem tekstu: Predstavnički dom) nije podržao navedeni prijedlog, a u diskusijama je iznesena konstatacija da je najbolje rješenje da se o mogućim nezakonitostima odredi Komisija za borbu protiv korupcije, a u skladu sa svojom nadležnošću i to nakon što Kolegij Sekretarijata dostavi relevantnu dokumentaciju. Također, pojedini državni službenici, rezignirani raspravom na Predstavničkom domu, obratili su mi se i usmeno me upoznali o deteljima nepravilnosti, a neke pojedinosti su šokantne. Zabrinjavajuće je da Kolegij Sekretarijata već duže vrijeme odbija da odgovara na moja zastupnička pitanje koja se odnose na konkretne nepravilnosti u radu Sekretarijata.

**II Onemogućavanje državnim zastupnicima postavljanja zastupničkih pitanja Kolegiju Sekretarijata Parlamentarne skupštine Bosne i Hercegovine - nesporna zloupotreba službenih ovlaštenja članova Kolegija Sekretarijata (član 224. stav (1) Krivičnog zakona Bosne i Hercegovine i čl. 6., 16. i 61. Zakona o parlamentarnom nadzoru)**

Dana 10. 10. 2025. godine dostavljen mi je dopis Marinka Čavare, predsjedavajućeg Predstavničkog doma Parlamentarne skupštine, u kojem je navedeno da moje zastupničko pitanje, koje sam dana 7. 10. 2025. godine postavio Kolegiju Sekretarijat, a nije postavljeno u skladu s odredbama člana 166. stav (1) Poslovnika i da isto nije bilo moguće proslijediti na daljnje postupanje, **jer je zastupničko pitanje suprotno Poslovniku, bez bilo kakvog obrazloženja zbog čega je pitanje suprotno Poslovniku.**

Kolegij Sekretarijata mi je isti dan dostavio odgovor u kojem me obavještava da „Kolegij Sekretarijata nije subjekt postavljanja poslaničkih pitanja i da odsad prestaju s praksom odgovaranja na moja poslanička pitanja“. **Sinergija između predsjedavajućeg Čavare i članova Kolegija Sekretarijata je očita. Ujedinjeni su na zadatku onemogućavanja zastupnika u provođenju parlamentarnog nadzora!**

Članovi Kolegija Sekretarijata ne žele dostaviti odgovore na zastupnička pitanja koja se odnose na njihov rad i svjesno odbijaju dostaviti zastupnicima traženu dokumentaciju. Zakonom o parlamentarnom nadzoru utvrđeno je da Parlamentarna skupština Bosne i Hercegovine (u daljnjem tekstu: PSBiH) vrši nadzor nad radom svih budžetskih i vanbudžetskih institucija Bosne i Hercegovine, a članom 6. stav (1) ovog zakona utvrđeno je da zastupnici provode parlamentarni nadzor postavljanjem zastupničkih pitanja. Sekretarijat PSBiH je budžetska institucija Bosne i Hercegovine.

Smatram da zbog navedenog, postoje osnovi sumnje da su članovi Kolegija Sekretarijata, kao odgovorna lica, počinili krivično djelo iz čl. 224. st. (1) Krivičnog zakona Bosne i Hercegovine, a u vezi s čl. 6., 16. i 61. Zakona o parlamentarnom nadzoru. Naime, članom 224. stav (1) Krivičnog zakona Bosne i Hercegovine propisano je: „Službeno lice u institucijama Bosne i Hercegovine, koje svjesnim kršenjem zakona, drugih propisa ili opšteg akta, očigledno nesavjesno postupi u vršenju dužnosti, pa usljed toga nastupi teža povreda prava drugog, kazniće se zatvorom od tri mjeseca do pet godina.“ Članovi Kolegija Sekretarijata su svjesnim kršenjem Zakona o parlamentarnom nadzoru, očigledno i nesavjesno postupili u vršenju dužnosti, jer nisu dostavili odgovore na zastupnička pitanja i nisu dostavili traženu dokumentaciju, čime su teže povrijedili pravo državnog zastupnika da provede nadzor nad radom Sekretarijata Parlamentarne skupštine.

**Zbog očigledne političke korupcije članova Kolegija Sekretarijata koja predstavlja izrazitu prijetnju očuvanju vladavine prava, potrebno je da Komisija za borbu protiv korupcije (u daljnjem tekstu: Komisija) traži izjašnjenje Kolegija Sekretarijata na okolnosti:**

S obzirom na to da Kolegij Sekretarijata, nakon više od 25 godina i stotine odgovora na zastupnička pitanja, odbija da odgovara na zastupnička pitanja, **potrebno je da se Kolegij Sekretarijata izjasni koje su se to odredbe Poslovnika i Zakona o parlamentarnom nadzoru promijenile odnosno koji je pravni osnov za odbijanja Kolegija Sekretarijata da odgovora na zastupnička pitanja?**

### **III Usvojene Izmjene i dopune Pravilnika o sistematizaciji u Sekretarijatu**

Na 12. sjednici Zajedničke komisije za administrativne poslove, održanoj 12.2.2025. godine, Zajednička komisija je dala pismenu saglasnost na Pravilnik o izmjenama i dopunama

Pravilnika o unutrašnjoj organizaciji i sistematizaciji radnih mjesta u Sekretarijatu Parlamentarne skupštine Bosne i Hercegovine, čime je Pravilnik zvanično stupio na snagu. Kolegij Sekretarijata je, suprotno zakonskom načelu transparentnosti i javnosti (član 3. st. 1. tačka b. Zakona o državnoj službi u institucijama Bosne i Hercegovine), sve vrijeme krio od zaposlenih informacije o tome da se priprema izmjena i dopuna Pravilnika o sistematizaciji i izrađeni nacrt nije dostavio rukovodiocima organizacionih jedinica radi dostavljanja mišljenja i konstruktivnih prijedloga na navedeni nacrt, što je suprotno dosadašnjoj praksi i zakonskoj obavezi transparentnog rada.

Zastupničkim pitanjem od 26. februara 2025. godine od Kolegija Sekretarijata sam tražio da mi odgovore na osnovu kojih kriterija i podataka je Kolegij Sekretarijata procijenio da u Sekretarijatu Parlamentarne skupštine Bosne i Hercegovine treba povećati broj izvršilaca za čak 14, kao i da navede šta se konkretno promijenilo u periodu od 2022. godine do danas, koji su to poslovi čiji je obim znatno povećan pa se planira povećati broj izvršilaca, te navesti precizne podatke koji opravdavaju potrebu za svako novo radno mjesto. **Općepoznato je da je tekućem mandatu, zbog poznatih blokada, znatno umanjen rad i aktivnost PSBiH.**

Do danas nisam dobio traženi odgovor niti je Kolegij Sekretarijata dostavio službenu dokumentaciju koja bi detaljno opravdala povećanje broja izvršilaca za 14, što ostavlja sumnju da uopće nema nikakve službene dokumentacije o razlozima za povećanje većeg broja zaposlenih čiji će troškovi za bruto plate na godišnjem nivou iznositi čak 350 hiljada KM. Nevjerovatan je podatak da je Izmjenom sistematizacije utvrđeno da u Sekretarijatu ima 239 radnih mjesta odnosno četiri zaposlena po jednom zastupniku odnosno delegatu, kada znamo da Skupština Srbije ima 458 zaposlenih na 250 poslanika (1,8 zaposleni na jednog poslanika) i da Hrvatski sabor ima 286 zaposlenih na 151 zastupnika (1,9 zaposleni na jednog zastupnika), a poznato je koliko Skupština Srbije i Hrvatski sabor godišnje usvajaju zakona i koliko dana godišnje zasjedaju.

Zbog osnova sumnje za zloupotrebu službenih ovlaštenja prilikom izrade i donošenja Pravilnika o izmjenama i dopunama Pravilnika o unutrašnjoj organizaciji i sistematizaciji radnih mjesta u Sekretarijatu Parlamentarne skupštine Bosne i Hercegovine, kao dokaz za utvrđivanje navedene nepravilnosti predlažem pribavljanje sljedeće dokumentacije:

- **Potrebno je da Komisija traži kompletnu službenu dokumentaciju koja bi detaljno opravdala povećanje broja izvršilaca za 14 u Sekretarijatu, poput povećanog obima posla, novih nadležnosti u Sekretarijatu, analize postojećeg kadrovskog stanja u Sekretarijatu, te finansijsku analizu troškova za ova nova radna mjesta.**

**IV Imenovanje u radne grupe i komisije za koje se dodjeljuje novčana naknada, dodijela stimulacija za povećan obim posla i izvanredne rezultate - grubo kršenje principa nepristrasnosti i korištenje budžetskih sredstava na način da se pogoduju pojedincima bliskim rukovodstvu**

Ukazano je na netransparentan rad i pristrasnost članova Kolegija Sekretarijata Parlamentarne skupštine, odnosno na protežiranje manjeg broja podobnih koji se godinama imenuje u radna tijela za koje se dobija novčana naknada. Također, dugogodišnja je praksa da se podobnima dodjeljuju stimulacija za navodno povećani obim posla, obavljanje vanrednih poslova i

izvanredne rezultate, bez jasnih i unaprijed utvrđenih kriterija, a kako kažu zaposleni, osnovni kriterij je bliskost pojedinaca s članovima Kolegija Sekretarijata. Nesporno je da Kolegij Sekretarijata godinama s razlogom krije sva rješenja o novčanim naknadama zaposlenih, protivno zakonskim i podzakonskim aktima, jer se sva službena dokumentacija vezano za naknade ne objavljuju na intranetu odnosno elektronskom djelovodniku PSBiH, protivno jednom od zakonskih principa rada državne službe, a to je transparentnost i javnost u radu institucija Bosne i Hercegovine. Isto tako, postoje osnovi sumnje da Kolegij Sekretarijata godinama grub krši temeljni princip državne službe, a to je nepristrasnost, na način da isti krug zaposlenih već godinama dobija hiljade i hiljade konvertibilnih maraka mimo plate, dok istovremeno brojni drugi zaposlenici i po 20 godina nikada nisu dobili niti jednu konvertibilnu marku po osnovu rada u radnim grupama ili stimulacije za povećan obim posla.

Napominjem da je članom 19. stav 3. Zakona o slobodi pristupa informacijama na nivou institucija Bosne i Hercegovine („Sl. glasnik BiH“ broj:61/23) utvrđeno da se ograničenje pristupa informacijama ne primjenjuje na imena zaposlenih, koji učestvuju u javnim poslovima, njihovim plaćama i drugim prihodima plaćenim iz budžetskih sredstava.

Zbog osnova sumnje za kontinuirano pogodovanje istom krugu zaposlenih, kao dokaz za navedene nepravilnosti predlažem pribavljanje sljedeće dokumentacije:

1. Tabela I: Spisak državnih službenika i zaposlenika u Sekretarijatu PSBiH kojima su isplaćene razne novčane naknade za period od 1. 1. 2023. godine do 1. 2. 2026. godine,
2. Tabela II: Spisak državnih službenika i zaposlenika u Sekretarijatu PSBiH kojima nije isplaćena nijedna KM za dodatni rad u radnim grupama i sl. za period od 1. 1. 2023. godine do 1. 2. 2026. godine,
3. Tražiti kopije svih prijedloga rukovodilaca organizacionih jedinica za stimulacije zbog povećanog obim posla, obavljanja vanrednih poslova i izvanrednih rezultata (Prilog 1. Pravilnika o novčanoj nagradi- -stimulaciji) i na osnovu kojih je Kolegij Sekretarijata odobrio isplate stimulacije za period 1. 1. 2023. godine do 1. 2. 2026. godine. **Ovo je ključni dokaz pogodovanja podobnim pojedincima.**

**V Donošenja odluka o službenim putovanjima državnih službenika u inostranstvo - grubo kršenje principa nepristrasnosti i korištenje budžetskih sredstava na način da se pogoduju pojedincima bliskim rukovodstvu**

Kolegij Sekretarijata već godinama sve pozive i odluke o službenim putovanjima državnih službenika u inostranstvo nezakonito krije od zaposlenih u Sekretarijatu čime se državnim službenicima uskraćuje njihovo pravo da se upoznaju sa svim pozivima i odlukama o službenim putovanjima. Također, članom 49. stav (3) Zakona o državnoj službi u institucijama Bosne i Hercegovine jasno je utvrđeno:

**“O učestvovanju državnih službenika na savjetovanjima i drugim oblicima obrazovnih aktivnosti odlučuje rukovodilac institucije, odnosno osoba određena podzakonskim aktom, vodeći pri tome računa o podjednakom učešću svih državnih službenika”.**

Zbog navedenog, postoje osnovi sumnje da Kolegij Sekretarijata godinama, svjesno i namjerno, grubo krši osnovni princip državne službe, a to je nepristrasnost, na način da isti krug zaposlenih već godinama redovno ide na službena putovanja, dok se istovremeno

**brojnim drugim zaposleniima ne odobravaju službena putovanja po 15 i više godina, uprkos zakonskoj obavezi o podjednakom učešću svih državnih službenika na službenim putovanjima.**

Napominjem da je članom 19. stav 3. Zakona o slobodi pristupa informacijama na nivou institucija Bosne i Hercegovine („Sl. glasnik BiH“ broj:61/23) utvrđeno da se ograničenje pristupa informacijama ne primjenjuje na imena zaposlenih, koji učestvuju u javnim poslovima, njihovim plaćama i drugim prihodima plaćenim iz budžetskih sredstava.

Zbog osnova sumnje za kontinuirano pogodovanje istom krugu zaposlenih, kao dokaz za navedene nepravilnosti predlažem pribavljanje sljedeće dokumentacije:

- Tabela III: Spisak državnih službenika Sekretarijata PSBiH kojima je odobreno službeno putovanje u periodu od 1. 1. 2023. godine do 1. 2. 2026. godine (izuzev državnih službenika Sektora za međunarodne odnose i protokol),
- Tabela IV: Spisak svih državnih službenika Sekretarijata PSBiH kojima nije odobreno nijedno službeno putovanje u periodu od 1. 1. 2023. godine do 1. 2. 2026. godine.

## **VI Ostale nezakonitosti i nepravilnosti u radu Sekretarijata PSBiH**

### **VI a) Primjeri kršenja zakona i zakonskih principa od strane Kolegija Sekretarijata**

U anonimnim prijavama i u razgovoru sa zaposlenima, navode se konkretni primjeri nezakonitog rada Kolegija Sekretarijata i kršenje principa transparentnosti i profesionalnosti u državnoj službi Bosne i Hercegovine, kako slijedi:

- Kolegij Sekretarijata je pojedinim podobnim državnim službenicima omogućio da godinama tradicionalno ponedjeljkom dolaze na posao oko 11-12 sati, a petkom da završavaju sa poslom prije 12 sati, bez ikakvih posljedica, samo zato što su bliski s članovima Kolegija Sekretarijata i njihovim političkim subjektima. Za navedeno postoje materijalni dokazi. **Sistemska korupcija ogleda se u činjenici da Kolegij Sekretarijata podobnim službenicima odobrava privatne izlaske u trajanju od 30 radnih dana i više tokom godine, dok se drugim službenicima smanjuje godišnja ocjena rada zbog izostanaka.**
- Pojedini rukovodeći državni službenici, uz prećutnu saglasnost članova Kolegija Sekretarijata, zloupotrebljavaju elektronske kartice o prisutnosti na poslu, na način da osim za sebe istovremeno koriste i karticu podređenih službenika ili podređeni službenici osim sebe ukucavaju i svoje pretpostavljene. Ovom zloupotrebom podobni pojedinci, i kada nisu fizički na poslu, vode se u službenim evidencijama da su radili i uredno dobijaju platu i za dane kada nisu prisutni na poslu. O navednim zloupotrebama postoje materijalni dokazi.
- Za pojedine državne službenike, koji imaju povlašten status kod članova Kolegija Sekretarijata, ne važi obaveza osmočasovnog prisustva na poslu, jer već godinama nakon prirodnog buđenja dolaze lagano na posao u periodu od 10 do 11 sati i naravno prije 16 sati odlaze s posla. I za ovo postoje materijalni dokazi, kako se navodi u prijavama. **Sistemska korupcija ogleda se u činjenici da Kolegij Sekretarijata podobnim službenicima odobrava privatne izlaske u trajanju od 30 radnih dana i**

**više tokom godine, dok se drugim službenicima smanjuje godišnja ocjena rada zbog izostanaka.**

- Vozačima Dragana Čovića i Nikole Špirića godinama se isplaćuju prekovremeni sati za svaki mjesec bez ikakvih materijalnih dokaza o službenim aktivnostima navedenih funkcionera izvan redovnog radnog vremena. Na ovaj način vozači redovno dobijaju novčane naknade za prekovremeni rad kao da su radili sedam radnih dana prekovremeno svaki mjesec.
- Pojednim državnim službenicima je omogućeno da, po svom nahodjenju i bez ikakve službene stvarne potrebe, ostaju na poslu duže od osam sati, pa im se odobravaju fiktivni prekovremeni sati. U Sekretarijatu se ostaje raditi izvan radnog vremena samo u slučaju kada se održavaju plenarne sjednice i sjednice stalnih ili ad hoc komisija.
- Iako Kolegij Sekretarijata dobro zna da je članom 39. Zakona o plaćama u institucijama Bosne i Hercegovine utvrđeno da mjesečna naknada za rad u upravnim odborima, nadzornim i svim drugim radnim tijelima može maksimalno iznositi do visine osnovice za obračun plaće zaposlenim u institucijama Bosne i Hercegovine i ne može se prekoračiti niti učešćem u radu više različitih radnih tijela, omogućio je podobnim državnim službenicima da dobijaju više od osnovice (ranije 600 KM, a sada 630 KM) za rad u radnim tijelima, što je protivno Zakonu o plaćama. Za navedeno je predviđena novčana kazna od 5.000 KM do 20.000 KM za rukovodioca institucije, u skladu s članom 56. istog zakona.
- PSBiH snosi troškove plaćanja parkinga za privatna vozila delegata i zastupnika, a Kolegij Sekretarijata organizira dodjelu zamjenskih parking kartica na njihova mjesta državnim službenicima koji su bliski s političkim subjektima, što je protivno principu profesionalnosti i političke neutralnosti državnih službenika.
- Komisija za saobraćaj i komunikacije Predstavničkog doma u aktelnom mandatu je uvjerljivo bila najaktivnija komisija u provođenju parlamentarnog nadzora. Komisija je u 2025. godini, održala 11. sjednica, javno saslušanje ministra Edina Forte i tematsku sjednicu o stanju u elektroenergetskom sektoru Bosne i Hercegovine. Sekretar ove Komisije je ocijenjen kao „uspješan“, a sekretari komisija koji su imali daleko manji obim posla, odnosno dvije ili tri sjednice u 2025. godini, ocijenjeni su kao „naročito uspješan“. Ovo je klasičan primjer subjektivne i proizvoljne procjene članova Kolegija Sekretarijata, čime je prekršen temeljni princip državne službe, a to je nepristrasnost rukovodilaca institucija.

Zbog osnova sumnje za zloupotrebu službenih ovlaštenja prilikom kontinuiranog pogodovanje istom krugu zaposlenih, kao dokaz za navedene nepravilnosti predlažem pribavljanje sljedeće dokumentacije:

- Tabela V: Spisak državnih službenika i zaposlenika (bez navođenja imena) Sekretarijata PSBiH kojima je odobreno 30 i više sati za privatni izlaz ili su 30 i više sati neopravdano izostali s posla (manjak radnih sati) u periodu od 1. 11. 2025. godine do 1. 2. 2026. godine.
- Potrebno je dostaviti broj prekovremenih sati za vozače Dragana Čovića i Nikole Špirića u periodu od 1. 8. 2025. do 1. 11. 2025. godine (u ovom periodu je bila jedna sjednica

Doma naroda), te službenu dokumentaciju kojom se dokazuju ostvareni prekovremeni sati za navedene vozače za septembar 2025. godine.

- Potrebno je tražiti podatke da li je državnim službenicima tokom 2025. godine Kolegij Sekretarijata odobrio isplatu bilo koje novčane naknade (stimulacije), iako je Kolegiju bila poznata činjenica da državni službenik od druge institucije dobija redovnu mjesečnu naknadu u visini osnovice za rad u upravnom odboru, komisiji ili vijeću.
- Na osnovu kojih kriterija Kolegij Sekretarijata vrši dodjelu zamjenskih parking kartica zaposlenima u Sekretarijatu za plaćena parking mjesta za privatna vozila delegata i zastupnika?
- Na osnovu kojeg općeg pravnog akta je Kolegij Sekretarijata imenovao sekretara Komisije za izbor praćenja rada Agencije za prevenciju korupcije i koordinaciju borbe protiv korupcije, jer je Pravilnikom o sistematizaciji jasno utvrđeno da sekretar ove komisije mora biti službenik Sektora za druga parlamentarna tijela?
- Na osnovu kojeg općeg pravnog akta je Kolegij Sekretarijata donio rješenja za dva zaposlenika sa srednjom stručnom spremom da, pored svog radnog mjesta, istovremeno obavljaju poslove drugog upražnjenog radnog mjesta državnoga službenika, jer zakonima Bosne i Hercegovine nije predviđena mogućnost da se rješenjem rukovodioca institucije zaposleni mogu raspoređivati na druga radna mjesta radi sticanja radnog iskustva, a što je utvrđeno i u Izvještaju Ureda za reviziju institucija BiH o obavljenoj finansijskoj reviziji Parlamentarne skupštine BiH za 2024. godinu?

## VII Rezime

Očigledan je strateški interes SNSD-a i HDZ-a da se obesmisli rad institucija Bosne i Hercegovine, pa tako direktori HDZ-a i SNSD-a koji rukovode institucijama poput Agencije za državnu službu BiH, Agencije za lijekove, Direkcije za ekonomsko planiranje, Agencije za školovanje i stručno usavršavanje kadrova i drugih institucija, svjesno i namjerno ne odgovaraju na zastupnička pitanja. **Sada se ovim institucijama pridružio i Kolegij Sekretarijata koji odbija da odgovori na zastupnička pitanja, grubo kršeći odredbe Zakona o parlamentarnom nadzoru.** Također, HDZ-ov direktor BHANSA-e, Davorin Primorac, protivno Zakonu o parlamentarnom nadzoru, već mjesecima odbija da Komisiji za saobraćaj i komunikacije dostavi dokumentaciju koju je Komisija tražila, dok zajedno sa zamjenikom (SNSD), već dva puta zbog „istovremene bolesti direktora i zamjenika“ ne dolazi na javno saslušanje. Jasan je cilj HDZ-a i SNSD-a da se kršenjem zakona onemogući parlamentarni nadzor, te da se obesmisle i javno ponize institucije Bosne i Hercegovine.

Za kraj, možda najbolji primjer koliko se članovi Kolegija Sekretarijata osjećaju nedodirljivim i zaštićenim od političkih subjekata koji su predložili njihovo imenovanje, **jeste primjer grubog kršenje službene dužnosti Dražena Mustapića, sekretara Predstavničkog doma.** Naime, na 27. sjednici Predstavničkog doma, održanoj 15. 4. 2025. godine, nakon što je zastupnik Jasmin Emrić komentirao 33 odgovora na zastupničko pitanje koji se odnose na etničku zastupljenost u tim institucijama Bosne i Hercegovine, za komentar se javio i zastupnik Predrag Kožul. U komentaru Predrag Kožul je istakao: „Pa, potaknut, ovaj, stalnom, ovaj

nastojanjima kolege Emrića i još nekih drugih kolega da utvrde nacionalnu strukturu uposlenih u institucijama BiH i **ja sam postavio takvo pitanje Vijeću ministra i moram kazati dobio dosta detaljan odgovor. (...) Dakle, nije dobro selektivno iznositi podatke, pa ću ja dopuniti i neke drugim podacima koji se tiču nacionalne zastupljenosti Hrvata u nekim institucijama BiH uz napomenu da to činim nerado (...)**“.

**Uvidom u transkript sjednice, šokantno je saznanje da se jedan dugogodišnji zastupnik usudi da komentira odgovor koji nije ni dobio. Zašto nije dobio? Vrlo jednostavno, zastupnik Kožul ni prije ni poslije nije nikada postavio pitanje o etničkoj strukturi u bilo kojoj instituciji!**

Nesporo je da kolega Kožul vrlo rado govori o etničkoj zastupljenosti zaposlenih u institucijama, jer u suprotnom ne bi grubo prekršio Poslovnik kako bi govorio upravo o temi za koju ističe da o njoj nerado govori. Naime, kolega Kožul protivno Poslovniku je komentirao odgovor na svoje navodno zastupničko pitanje Vijeću ministra Bosne i Hercegovine o nacionalnoj strukturi, iako on nikada uopće nije postavio bilo kakvo zastupničko pitanje o etničkoj strukturi u institucijama, niti je u najavi sjednice naveden bilo kakav odgovor za kolegu Kožula, što se jasno vidi iz transkripta sjednice. Kolega Kožul je dobro znao da je do 27. sjednice Doma postavio samo jedno zastupničko pitanje i da mu je Ministarstvo finansija Federacije Bosne i Hercegovine dostavilo odgovor u februaru 2024. godine. Jedna digresija, Marinko Čavara već mjesecima ne dozvoljava da se zastupnička pitanja prosljede entitetskim i kantonalnim organima, ali o radu Marinka Čavare uskoro ću se javno oglasiti.

Više je nego jasno da je zastupnik Kožul svjesno zloupotrijebio pravo zastupnika na komentare, samo kako bi replicirao zastupniku Jasminu Emriću na njegov komentar o brutalnoj diskriminaciji Bošnjaka. **Ovo je sigurno jedinstven slučaj u radu Predstavničkog doma da zastupnik izmisli nepostojeće pitanje i nepostojeći odgovor. Sekretar Mustapić, koji je morao znati da zastupnik Kožul niti je postavio pitanje niti je dobio odgovor, svjesno je obmanuo predsjedavajućeg Denisa Zvizdića i nije ga upozorio da zastupnik Kožul nema pravo na komentar.**


**Kada se uzme u obzir ovaj primjer, kao i brojni gore navedeni eklatantni primjeri nepravilnosti i javašluka u radu Kolegija Sekretarijata, cijeneći nadležnost Komisije za borbu protiv korupcije da provodi parlamentarni nadzor s ciljem otkrivanja i prevencije svih oblika korupcije, smatram da je Komisija u obavezi da traži od Kolegija Sekretarijata da dostavi Komisiji svu relevantnu dokumentaciju navedenu u inicijativi, te da uvidom u dostavljenu dokumentaciju preduzme sve potrebne mjere.**

U prilogu dostavljam sljedeću dokumentaciju: 1. Dopis Marinka Čavare, predsjedavajućeg Doma, kojim obavještava zastupnika Šemsudina Mehmedovića da neće proslijediti njegovo zastupničko pitanje postavljeno Kolegiju Sekretarijata Parlamentarne skupštine Bosne i Hercegovine, dopis od 9. 10. 2025.; 2. Dopis Kolegija Sekretarijata Parlamentarne skupštine Bosne i Hercegovine kojim obavještava zastupnika Šemsudina Mehmedovića da ubuduće neće odgovarati na zastupnička pitanja, dopis od 9. 10. 2025.; 3. Tri zastupnička pitanja Šemsudina Mehmedovića ne koje Kolegij Sekretarijata nije dostavio odgovore; 4. Izvod iz Izvještaja o obavljenoj finansijskoj reviziji Parlamentarne skupštine Bosne i Hercegovine za 2024. godinu u kojem je utvrđeno nezakonito postupanje Kolegija Sekretarijata i kršenje Zakona o radu u

institucijama BiH; 5. Pet tabela koje su navedene u tekstu inicijative, 6. Izvod iz transkripta 27. sjednice Predstavničkog doma, koja je održana 15. 4. 2025., 7. Pregled svih zastupničkih pitanja koje je u tekućem mandatu postavio Predrag Kožul.

S poštovanjem,

ZASTUPNIK PS BiH  
Šemsudin Mehmedović



Dostavljeno:

- naslovu
- a/a



Broj: 01-50-1-2143/25

Sarajevo, 9. 10. 2025.

ZASTUPNIKU U ZASTUPNIČKOM DOMU  
PARLAMENTARNE SKUPŠTINE  
BOSNE I HERCEGOVINE  
- Šemsudinu Mehmedoviću-

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 10-10-2025			
Organizaciona jedinica	Klasifikaciona oznaka	Kodni broj	Broj priloga

**Predmet:** Zastupničko pitanje, obavijest – dostavlja se

Poštovani,

Sukladno čl. 170. i 171. Poslovnika Zastupničkog doma Parlamentarne skupštine BiH („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24, 73/24 i 56/25), 7. listopada 2025. uputili ste Sekretarijatu Parlamentarne skupštine Bosne i Hercegovine pitanje u pisanom obliku.

S obzirom da Vaše pitanje nije postavljeno sukladno odredbama članka 166. stavak (1) Poslovnika Zastupničkog doma Parlamentarne skupštine BiH, kojim je propisano da zastupnici mogu postavljati pitanja i podnositi inicijative predsjedatelju i članovima Vijeća ministara BiH ili drugim subjektima iz djelokruga njihove nadležnosti, osobito o stanju u pojedinim područjima društvenog života te provedbi zakona i drugih akata Parlamentarne skupštine BiH, odnosno o radu ministarstava i drugih tijela državne uprave, isto nije bilo moguće proslijediti na daljnje postupanje, jer je suprotno Poslovniku Zastupničkog doma Parlamentarne skupštine Bosne i Hercegovine. !!!

S poštovanjem,

Dostaviti:

- naslovu
- a/a





Broj: 01-50-1-2143/25  
Sarajevo, 9. 10. 2025

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 10-10-2025			
Organizaciona jedinica	Klasifikaciona oznaka	Redni broj	Broj priloga

PREDSTAVNIČKI DOM  
PARLAMENTARNE SKUPŠTINE BiH  
n/r poslanika Šemsudina Mehmedovića

**Predmet:** Odgovor na poslaničko pitanje broj: 01-50-1-2143/25 od 7.10.2025. *dostavlja se*

Poštovani gospodine Mehmedović,

Od početka mandata ovog saziva Predstavničkog doma Parlamentarne skupštine BiH, Kolegij Sekretarijata Parlamentarne skupštine je odgovorio na ukupno trideset Vaših poslaničkih pitanja. Iako smo od prvog upućenog pitanja bili svjesni da u skladu sa odredbama člana 166. Poslovnika Predstavničkog doma nismo subjekat postavljanja poslaničkih pitanja, odlučili smo odgovarati na postavljena pitanja prije svega iz poštovanja prema poslanicima Predstavničkog doma, a potom i zbog opredjeljenja ka što većoj transparentosti i odgovornosti u radu Sekretarijata Parlamentarne skupštine BiH.

Nažalost, svjedoci smo da je takav naš stav očito zloupotrijebljen obzirom da ste pored postavljanja pitanja, zatim dopunskih pitanja prešli na otvorene difamacije Kolegija Sekretarijata Parlamentarne skupštine BiH.

Imajući u vidu navedeno, informišemo Vas da u skladu sa članom 166. Poslovnika Predstavničkog doma koji propisuje da „Poslanici mogu postavljati pitanja i podnositi inicijative predsjedavajućem i članovima Savjeta ministara BiH ili drugim subjektima iz njihove nadležnosti, posebno o stanju u pojedinim oblastima društvenog života i sprovođenju zakona i drugih akata Parlamentarne skupštine BiH, odnosno o radu ministarstava i drugih organa državne uprave“ od sad prestajemo sa praksom odgovaranja na Vaša poslanička pitanja. !!!

Napominjemo da smo takođe razmotrili i odredbu člana 31. Zakona o Parlamentarnom nadzoru („Službeni glasnik BiH“, broj: 25/18), kojim je propisano da „Poslanici i delegati mogu postavljati pitanja i podnositi inicijative predsjedavajućem i članovima Savjeta ministara BiH, ili drugim subjektima iz njihove nadležnosti, posebno o stanju u pojedinim područjima društvenog života i provedbi zakona i drugih akata Parlamentarne skupštine Bosne i Hercegovine, odnosno o radu ministarstava i drugih tijela državne uprave“. Iz naprijed navedenog člana Zakona na koji se često pozivate prilikom obraćanja Kolegiju Sekretarijata, proizlazi da su subjekti nadzora predstavnici i tijela isključivo izvršne vlasti, a nikako Sekretarijat Parlamentarne skupštine Bosne i Hercegovine.

S poštovanjem,



Dostavljeno:

- naslovu
- a/a



Broj: 01- 493 /25  
Sarajevo: 28. 5. 2025.godine

Šemsudin Mehmedović

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO:			
Organizaciona jedinica	Kvalifikaciona oznaka	Redni broj	Broj priloga
01-	50-1-	526-3	25

PREDSTAVNIČKI DOM  
PARLAMENTARNE SKUPŠTINE BOSNE I HERCEGOVINE  
n/r predsjedavajućeg

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 53/22, 59/23, 87/23 i 50/24) postavljam sljedeće

**DOPUNSKO ZASTUPNIČKO PITANJE ZA  
SEKRETARIJAT PARLAMENTARNE SKUPŠTINE  
BOSNE I HERCEGOVINE**

1. Potrebno je da Kolegij Sekretarijata Parlamentarne skupštine Bosne i Hercegovine (u daljnjem tekstu: Kolegij Sekretarijata) dostavi transkript cjelokupne rasprave o tački “Prijedlog pravilnika o izmjenama i dopunama Pravilnika o unutrašnjoj organizaciji i sistematizaciji radnih mjesta u Sekretarijatu Parlamentarne skupštine Bosne i Hercegovine” (u daljnjem tekstu: Pravilnik), sa 12. sjednice Zajedničke komisije za administrativne poslove, zatim dopis Kolegija Sekretarijata za Zajedničku komisiju i Prijedlog pravilnika sa obrazloženjem i sve priloge koji su opredijelili Zajedničku Komisiju kako bi dala saglasnost na Pravilnik kojim se u Sekretarijatu Parlamentarne skupštine BiH (u daljnjem tekstu: Sekretarijat) povećao broj državnih službenika za čak 14 izvršilaca.
2. Potrebno je da obavezno dostavite spisak i nazive svih 14 novih radnih mjesta koja su utvrđena Pravilnikom i da konkretno u dvije do tri rečenice jasno navedete razloge koji opravdavaju potrebu za svako novo radno mjesto uključujući i razloge za povećanje broja izvršilaca na postojećim pozicijama. Primjera radi, u Sektoru za Evropsku uniju uvedeno je jedno dodatno radno mjesto stručnog savjetnika za informiranje o poslovima u vezi s EU, pa je potrebno je obrazložiti u čemu se ogleda povećan obim poslova navedenog radnog mjesta. Također, navesti broj pozicija stručnog i višeg stručnog saradnika koje se ukinute Pravilnikom.
3. Potrebno je da dostavite podatke o broju informacija, izvještaja, mišljenja i obavještenja koje su dostavljene Predstavničkom domu i Domu naroda u periodu od 1. 1. 2025. do 28. 5. 2025. godinete, a koje su dostavile Ustavnopravna komisija Predstavničkog doma, Komisija za finansije i budžet Doma naroda i Sektoru za EU, zatim broj trenutnih izvršilaca u u navedenim uredima sekretara i sektoru, te podatke dostaviti posebno za svaku organizacionu jedinicu, jer se u istim povećao broj izvršilaca.

U skladu s članom 171. st. (2) Poslovnika Predstavničkog doma odgovor u pisanoj formi mora se dostaviti u roku od 30 dana od dana kada je pitanje dostavljeno onome kome je upućeno. Zakonom o parlamentarnom nadzoru („Službeni glasnik BiH“, br. 25/18) propisane su sankcije za neodgovaranje na poslanička pitanja (član 64. stav (1.) tačka a) i b) Zakona.

#### Obrazloženje

Članom 6. Zakona o parlamentarnom nadzoru propisano je da zastupnici provode nadzor nad radom institucija Bosne i Hercegovine postavljanjem zastupničkih pitanja, a članom 7. stav 2. istog zakona, utvrđeno je da se **parlamentarni nadzor provodi radi preventivne zaštite od zloupotrebe položaja i ovlaštenja, materijalnih i finansijskih resursa.**

Kolegiju Sekretarijata već sam postavio dva zastupnička pitanja vezano za Pravilnik o izmjenama i dopunama Pravilnika o unutrašnjoj organizaciji i sistematizaciji radnih mjesta u Sekretarijatu Parlamentarne skupštine Bosne i Hercegovine, netransparentnosti u donošenju Pravilnika, te jasno naveo pitanja i tražio potrebne činjenice i informacije. Međutim, Kolegij Sekretarijata uopće nije postupio u skladu sa zastupničkim pitanjima.

**Odgovori koje sam dobio od Kolegija Sekretarijata prijete da u potpunosti degradiraju institut zastupničkog pitanja i njegovu važnost, čime je jasno iskazano nepoštovanje prema zastupniku i samom Predstavničkom domu.** Kolegij Sekretarijata je u odgovorima nepotrebno navodio koje su njihove nadležnosti, umjesto konkretnih odgovora vezano za izuzetno povećanje broja državnih službenika za čak 14 izvršilaca, dok primjera radi vrlo bitna institucija kao što je Pravobranilaštvo Bosne i Hercegovine ima ukupno 20 zaposlenih!

Zakonom o parlamentarnom nadzoru jasno je utvrđeno da tijelo koje provodi parlamentarni nadzor može zahtjevati od bilo koje institucije odgovore na sva pitanja, **čak i ona koja se smatraju tajnim podatkom.**

**Ukoliko Kolegij Sekretarijata ne postupi u skladu s mojim zastupničkim pitanjem koje je treće na istu temu i ne dostavi sve tražene činjenice i informacije, u skladu sa Zakonom o parlamentarnom nadzoru ostaje mi mogućnost da iniciram javno saslušanje članova Kolegija Sekretarijata.**


Javno saslušanje ne bi se bavilo samo navedenim Pravilnikom i činjenicom da 200 zaposlenih u Sekretarijatu nije dovoljno za Parlament koji ima 57 zastupnika i delegata, nego i mogućim drugim nepravilnostima za koja imam saznanja.

Kao moguće nepravilnosti navodim: provođenje konkursa na kojima u pravilu briljiraju osobe koje su bile zaposlene u kabinetima Nebojše Radmanovića i Nikole Špirića, te s njihovim stranačkim kolegama rodbinski povezana lica; zatim dodjela stimulacija zaposlenim bez jasno utvrđenih kriterija; nedovoljan broj zaposlenih Bošnjaka u Sekretarijatu, izuzev na slabije plaćenim pozicijama srednje stručne spreme; tvz. paritet pri donošenju odluka o putovanjima i imenovanjima u komisije za koje se dodjeljuje novčana naknada i to isključivo po principu jedan Bošnjak, jedan Hrvat i jedan Srbin, uprkos činjenici da je u Sekretarijatu zaposleno 87 Bošnjaka i 35 Hrvata - ovo je kao "jednakopravnost konstitutivnih naroda"; stav Kolegija Sekretarijata da se odluke Ustavnog suda Bosne i Hercegovine ne moraju provoditi pošto Kolegij odluke donosi

konsenzusom, mada je i studentima prava poznato da je nebitno da li neki kolegijalni organ donosi odluke većinom glasova ili konsenzusom, jer se odluke Ustavnog suda i zakoni Bosne i Hercegovine moraju primjenjivati bez obzir na način donošenja odluka.

S poštovanjem,

ZASTUPNIK PS BiH  
Šemsudin Mehmedović



БОСНА И ХЕРЦЕГОВИНА  
ПАРЛАМЕНТАРНА СКУПШТИНА  
БОСНЕ И ХЕРЦЕГОВИНЕ



BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE

ПРЕДСТАВНИЧКИ ДОМ

PREDSTAVNIČKI DOM/ZASTUPNIČKI DOM

*Semsudin Mehmedović*  
BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

Broj: 01-522/25

Sarajevo: 2. 10. 2025. godine

PRIMLJENO:			
Organizaciona jedinica	Klasifikaciona oznaka	Redni broj	Broj priloga
01-	CO-1-	10-2025 12116	125

**PREDSTAVNIČKI DOM**

**PARLAMENTARNE SKUPŠTINE BOSNE I HERCEGOVINE**

n/r predsjedavajućeg

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 53/22, 59/23, 87/23, 50/24 i 56/25) postavljam sljedeće **zastupničko pitanje institucijama Bosne i Hercegovine** koje glasi:

1. Potrebno je da institucije Bosne i Hercegovine dostave podatke o etničkoj strukturi svih zaposlenih na dan 01.10.2025. godine, na način da se dostave podaci o zastupljenosti Bošnjaka, Srba, Hrvata i Ostalih/Neopredjeljenih, i to: ukupan broj zaposlenih, broj/procentat Bošnjaka od ukupnog broja, broj/procentat Srba, broj/procentat Hrvata i broj/procentat Ostalih/Neopredjeljenih.
2. Potrebno je da institucije Bosne i Hercegovine dostave podatke o etničkoj strukturi svih zaposlenih koji su zasnovali radni odnos u u periodu od 01.01.2023. do 01.10.2025. godine, na način da se dostave podaci: ukupan broj zaposlenih koji su zasnovali radni odnos, broj/procentat Bošnjaka od ukupnog broja, broj/procentat Srba, broj/procentat Hrvata i broj/procentat Ostalih/Neopredjeljenih.
3. Potrebno je da institucije Bosne i Hercegovine dostave podatke o etničkoj strukturi svih državnih službenika koji su zasnovali radni odnos u u periodu od 01.01.2023. do 01.10.2025. godine, na način da se dostave podaci: ukupan broj zaposlenih državnih službenika koji su zasnovali radni odnos, broj/procentat Bošnjaka od ukupnog broja, broj/procentat Srba, broj/procentat Hrvata i broj/procentat Ostalih/Neopredjeljenih.
4. Potrebno je da institucije Bosne i Hercegovine dostave podatke o etničkoj strukturi rukovodećih državnih službenika i šefova unutrašnjih organizacionih jedinica na dan 01.10.2025. godine, na način da se dostave posebni podaci za rukovodeće i za šefove, i to: ukupan broj, broj/procentat Bošnjaka od ukupnog broja, broj/procentat Srba, broj/procentat Hrvata i broj/procentat Ostalih/Neopredjeljenih.

U skladu s članom 171. st. (2) Poslovnika Predstavničkog doma odgovor u pisanoj formi mora se dostaviti **u roku od 30 dana** od dana kada je pitanje dostavljeno onome kome je upućeno. Zakonom o parlamentarnom nadzoru („Službeni glasnik BiH“, br. 25/18) propisane su sankcije za neodgovaranje na poslanička pitanja (član 64. stav (1.) tačka a) i b) Zakona.

**Napomena:** Za sve institucije koje ne dostave odgovor u propisanom roku od 30 dana, protiv rukovodilaca tih institucija biće podnesena prijava Upravnom inspektoratu Bosne i Hercegovine radi preduzimanja zakonom utvrđenih mjera.

U prilogu zastupničkog pitanja dostavljam spisak institucija kojima se upućuje zastupničko pitanje

#### Objasnenje

Članom 7. Zakona o upravi jasno je utvrđeno: „U organima uprave osigurava se **odgovarajuća nacionalna zastupljenost državnih službenika i zaposlenika u skladu sa nacionalnom strukturom stanovništva, a prema posljednjem popisu stanovništva u Bosni i Hercegovini**“. Također, Zakonom o državnoj službi u institucijama Bosne i Hercegovine i Zakonom o radu u institucijama Bosne i Hercegovine propisana je proporcionalna etnička zastupljenost prema posljednjem popisu stanovništva.

**Odlukom Ustavno suda Bosne i Hercegovine (U-23-14-1058444) – predmet „Ljubić“ od 1. decembra 2016. godine) utvrđeno je : „(...) Pored navedenog, iz naprijed navedenih odredaba Ustava Bosne i Hercegovine slijedi da je ustavotvorac u institucijama Bosne i Hercegovine uspostavio proporcionalnu zastupljenost Bošnjaka, Srba i Hrvata kao konstitutivnih naroda“ (str. 21.).**

Više od dvije i po godine upozoravam na **grubo kršenje Ustava Bosne i Hercegovine i državnih zakona po pitanju zastupljenosti Bošnjaka, Srba, Hrvata i Ostalih u institucijama Bosne i Hercegovine**. Više puta sam iznosio podatke koji dokazuju da mnogobrojni rukovodioci institucija, **svjesno i namjerno krše jasne zakonske odredbe o obaveznoj proporcionalnoj etničkoj zastupljenosti, sve s ciljem da se u institucijama zaposli što manji broj Bošnjaka, posebno na rukovodećim pozicijama**.

To rade, prije svega, ministri i direktori koji su kadrovi SNSD-a i HDZ-a. Kao najbrojniji narod u Bosni i Hercegovini, koji sa najmanje 50% učestvuje u prikupljanju indirektnih poreza i finansira Budžet institucija, Bošnjacima je pripalo svega 20% direktorskih pozicija. **Nesporno je da su Bošnjaci kao etnička grupa grubo diskriminirani, što je rezultat udružene aktivnosti decenijskih strateških partnera HDZ-a i SNSD-a i, nažalost, dugogodišnje pasivnosti većine bošnjačkih kadrova u institucijama**. U samo šest institucija Bosne i Hercegovine zaposleno je čak 371 Bošnjak manje od zakonom utvrđenog broja! Za ovakav aparthejd nad Bošnjacima “zaslužni” su kadrovi HDZ-a: Davor Bunoza, ministar pravde (55 Bošnjaka manje), Mirko Kuprešaković, direktor Granične policije BiH (25 Bošnjaka manje), te kadrovi SNSD-a: Srdan Amidžić, ministar finansija i trezora (28 Bošnjaka manje), Staša Košarac, ministar vanjske trgovine i ekonomskih odnosa (24 Bošnjaka manje), Zoran Tegeltija, direktor Uprave za

indirektno oporezivanje (217 Bošnjaka manje) i Saša Bošković, direktor Ureda za veterinarstvo (22 Bošnjaka manje).

Moram posebno istaći ulogu Anite Markić, direktorice Agencije za državnu službu i Roberta Vidovića, generalnog sekretara Vijeća ministara. Ovaj tandem je, u posljednje dvije godine, imenovanjem isključivo podobnih članova konkursnih komisija za izbor državnih službenika ostvario svoj i HDZ-ov prevashodni cilj **da se zaposli što manji broj Bošnjaka, a posebno na rukovodećim pozicijama**. Podatak da su od februara 2023. godine do novembra 2024. godine od 20 pomoćnika ministara i direktora, na pozicije rukovodećih državnih službenika, u stalni radni odnos primljena **samo tri Bošnjaka, čak 11 Srba i šest Hrvata**. Postavlja se pitanje da li su Bošnjaci toliko loši kandidati da se od 20 konkursa za rukovodeće pozicije imenuje samo troje Bošnjaka ili je pravi razlog rad konkursnih komisija na čiji rad Anita Markić presudno utiče imenovanjem podobnih članova komisija, jer je poznato da se konkursi fingiraju i unaprijed se zna koji će kandidat biti primljen. **Izgleda da za najvažnije rukovodeće pozicije u državnoj službi "jednostavno nema dovoljno dobrih kandidata Bošnjaka", bar tako su procijenile "objektivne" konkursne komisije koje imenuje Agencija za državnu službu Bosne i Hercegovine.**


Krajnje je vrijeme da se hitno zaustavi dosadašnja praksa nezakonitog rada konkursnih komisija i **uspostavi moratorij na zapošljavanje i imenovanja** u institucijama. Mora se odmah utvrditi trenutno stanje etničke zastupljenosti u svim institucijama i zahtijevati dosljedno provođenje Ustava Bosne i Hercegovine i zakona Bosne i Hercegovine po pitanju proporcionalne etničke zastupljenosti u institucijama na državnom nivou, na način da bi prioritarno trebalo primati u radni odnos one osobe koji pripadaju konstitutivnom narodu i ostalima koji nisu dovoljno zastupljeni u strukturi zaposlenika i državnih/policijskih službenika svake pojedine institucije.

**U mišljenju Ministarstva pravde Bosne i Hercegovine broj 08-02-4-2673/13 od 25. marta 2013. godine**, u vezi s popunjavanjem zaposlenika u jednoj instituciji na nivou države Bosne i Hercegovine, navedeno je sljedeće: „ (...) **Prioritetno bi trebalo primati one kandidate koji pripadaju narodu koji nije dovoljno zastupljen u strukturi zaposlenika poslodavca**. Naravno, može se primati samo onaj kandidat koji ispunjava sve uslove za radno mjesto koje se popunjava”. (Mišljenje tadašnjeg državnog ministra pravde Bosne i Hercegovine Bariše Čolaka.)

U prilogu poslaničkog pitanja dostavljam mišljenje Ministarstva pravde Bosne i Hercegovine broj 08-02-4-2673/13 od 25. 3. 2013. godine.

S poštovanjem,

ZASTUPNIK PS BiH  
Šemsudin Mehmedović



46. Konkurencijsko vijeće Bosne i Hercegovine
47. Ministarstvo civilnih poslova Bosne i Hercegovine
48. Ministarstvo finansija i trezora Bosne i Hercegovine
49. Ministarstvo komunikacija i prometa Bosne i Hercegovine
50. Ministarstvo odbrane Bosne i Hercegovine
51. Ministarstvo pravde Bosne i Hercegovine
52. Ministarstvo sigurnosti Bosne i Hercegovine
53. Ministarstvo vanjske trgovine i ekonomskih odnosa Bosne i Hercegovine
54. Ministarstvo vanjskih poslova Bosne i Hercegovine
55. Ministarstvo za ljudska prava i izbjeglice Bosne i Hercegovine
56. Nezavisni operator sistema u Bosni i Hercegovini
57. Odbor državne službe za žalbe
58. Pravobranilaštvo Bosne i Hercegovine
59. Regulatorna agencija za komunikacije Bosne i Hercegovine
60. Regulatorni odbor željeznica Bosne i Hercegovine
61. Sekretarijat Parlamentarne skupštine Bosne i Hercegovine
62. Sekretarijat Predsjedništva Bosne i Hercegovine
63. Sekretarijat Ustavnog suda Bosne i Hercegovine
64. Služba za poslove sa strancima
65. Služba za zajedničke poslove institucija Bosne i Hercegovine
66. Sud Bosne i Hercegovine
67. Tužilaštvo Bosne i Hercegovine
68. Uprava Bosne i Hercegovine za zaštitu bilja
69. Uprava za indirektno oporezivanje Bosne i Hercegovine
70. Ured koordinatora za reformu javne uprave Bosne i Hercegovine
71. Ured za harmonizaciju i koordinaciju sistema plaćanja u poljoprivredi, ishrani i ruralnom razvoju BiH
72. Ured za razmatranje žalbi Bosne i Hercegovine
73. Ured za reviziju institucija Bosne i Hercegovine
74. Ured za veterinarstvo Bosne i Hercegovine
75. Ured za zakonodavstvo Vijeća ministara Bosne i Hercegovine
76. Vijeće za državnu pomoć BiH
77. Visoko sudsko i tužilačko vijeće Bosne i Hercegovine
78. Zavod za izvršenje krivičnih sankcija, pritvora i drugih mjera



Šemsudin Mehmedović

BOSNA I HERCEGOVINA

PARLAMENTARNA SKUPŠTINA BOSNE I HERCEGOVINE  
SARAJEVO

Broj: 01-585/25

Sarajevo: 7. 10. 2025. godine

PRIMLJENO:	07-10-2025		
Organizaciona jedinica	Klasifikaciona oznaka	Redni broj	Broj priloga
01-	10-1-	2143	25

PREDSTAVNIČKI DOM

PARLAMENTARNE SKUPŠTINE BOSNE I HERCEGOVINE

n/r predsjedavajućeg

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 53/22, 59/23, 87/23, 50/24 i 56/25) postavljam sljedeće

**ZASTUPNIČKO PITANJE ZA  
SEKRETARIJAT PARLAMENTARNE SKUPŠTINE  
BOSNE I HERCEGOVINE**

1. Potrebno je dostaviti podatke o zastupničkim pitanjima u pisanoj formi koja su postavljena u periodu od 1. 1. 2023. do 20. 9. 2025. godine, na način da se dostave pojedinačni podaci za svakog zastupnika: ime i prezime, ukupan broj postavljenih zastupničkih pitanja, broj pitanja na koje je dostavljen odgovor i broj pitanja na koje nije dostavljen odgovor. Za pitanja na koja nije dostavljen odgovor potrebno je navesti instituciju koja nije dostavila odgovor i datum postavljenog zastupničkog pitanja.
2. Potrebno je dostaviti podatke o usmenim zastupničkim pitanjima koja su postavljena u periodu od 1. 1. 2023. do 12. 9. 2025. godine, na način da se dostave pojedinačni podaci za svakog zastupnika: ime i prezime, ukupan broj postavljenih zastupničkih pitanja, broj pitanja na koje je dostavljen odgovor i broj pitanja na koje nije dostavljen odgovor. Za pitanja na koja nije dostavljen odgovor potrebno je navesti instituciju koja nije dostavila odgovor i datum postavljenog zastupničkog pitanja.

U skladu s članom 171. st. (2) Poslovnika Predstavničkog doma odgovor u pisanoj formi mora se dostaviti **u roku od 30 dana** od dana kada je pitanje dostavljeno onome kome je upućeno. Zakonom o parlamentarnom nadzoru („Službeni glasnik BiH“, br. 25/18) propisane su sankcije za neodgovaranje na poslanička pitanja (član 64. stav (1.) tačka a) i b) Zakona.

S poštovanjem,

ZASTUPNIK PS BiH  
Šemsudin Mehmedović



### 7.3.1. Obaveze

Zakonom o plaćama i naknadama u institucijama BiH<sup>23</sup> definisano je kako se obračun poreza i doprinosa na ukupna primanja zaposlenih u institucijama BiH vrši primjenom zakonskih propisa prema mjestu prebivališta zaposlenog. Navedena odredba se također primjenjuje na identičan način i na primanja članova upravnih, nadzornih i drugih radnih tijela iz nadležnosti institucija Bosne i Hercegovine.

Parlamentarna skupština je za članove Odbora za žalbe građana na rad policijskih službenika za period od 28.07.2009. do 31.12.2012. godine evidentirala i izmirivala samo obaveze za porez za ostvarenu naknadu. Nakon pribavljenih mišljenja Ministarstva finansija RS i Poreske uprave RS utvrđeno je kako naknade isplaćene imenovanoj osobi imaju karakter ličnih primanja. Na osnovu navedenog, Parlamentarna skupština je u 2023. godini evidentirala i izmirila dio obaveza po osnovu doprinosa na lična primanja iz ranijeg perioda za dvije osobe u ukupnom iznosu od 14.841 KM. Preostali dio neizmirenih obaveza vezano za rad navedenog odbora odnosi se na jednu imenovanu osobu koja je ostvarila pravo na penziju, a za koju ni u 2024. godini nisu evidentirane niti izmirene obaveze na osnovu doprinosa za lična primanja. Također, obaveze za doprinose za jednog zaposlenog koji je bio član Nezavisne komisije u periodu 2011. – 2015. godina nisu evidentirane niti uplaćene.

#### PREPORUKA 6

Parlamentarna skupština treba u poslovnom kalendaru za 2024. godinu zaostalih doprinosa iz ranijih godina.

## 8. ZAPOŠLJAVANJE I STATUS ZAPOSLENIH (ANGAŽOVANIH) OSOBA

**Obavljanje poslova drugog radnog mjesta:** Zakonom o radu u institucijama BiH<sup>24</sup> i Pravilnikom o internom premještanju i raspoređivanju zaposlenika u institucijama BiH<sup>25</sup> te Zakonom o državnoj službi u institucijama BiH<sup>26</sup> i Pravilnikom o uslovima i načinu obavljanja internih konkursa, internih i eksternih premještanja državnih službenika u institucijama BiH<sup>27</sup> definisani su način i uslovi za premještanje i raspoređivanja zaposlenika i državnih službenika na radna mjesta istog, višeg i nižeg nivoa. Parlamentarna skupština BiH je izdala rješenja za dva zaposlenika<sup>28</sup> sa srednjom stručnom spremom, koji su u međuvremenu stekli visoku stručnu spremu, da pored svog radnog mjesta obavljaju poslove drugog upražnjenog radnog mjesta državnog službenika, zbog potreba službe, kao i sticanja radnog iskustva u struci.

Smatramo da navedeno nije u skladu sa prethodno navedenim propisima, jer istim nije predviđena mogućnost da se rješenjem rukovodioca institucije zaposleni mogu raspoređivati na druga radna mjesta radi sticanja radnog iskustva.

<sup>23</sup> Službeni glasnik BiH broj 50/08, 35/09, 75/09, 80/10, 32/12, 42/12, 50/12, 32/13, 87/13, 75/15, 88/15, 16/16, 94/16, 72/17, 25/18, 32/20, 65/20 i 59/22

<sup>24</sup> Službeni glasnik BiH, broj 26/04, 07/05, 48/05, 50/08, 60/10, 32/13, 93/17, 59/22 i 88/23

<sup>25</sup> Službeni glasnik BiH, broj 19/12 i 49/13

<sup>26</sup> Službeni glasnik BiH, broj 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10, 40/12, 93/17 i 18/24

<sup>27</sup> Službeni glasnik BiH, broj 62/10, 30/14 i 38/17

<sup>28</sup> Rješenje od 29.11.2023. godine i rješenje od 03.04.2024. godine

**PREPORUKA 7**

**Parlamentarna skupština je dužna dosljedno primjenjivati propise koji reguliraju radnopravni status zaposlenih u institucijama BiH.**

**9. JAVNE NABAVKE**

Parlamentarna skupština je donijela i objavila Plan javnih nabavki za 2024. godinu, kako je propisano Zakonom o javnim nabavkama<sup>29</sup>.

Prema prezentovanim podacima<sup>30</sup>, Parlamentarna skupština je u 2024. godini provela 19 postupaka javnih nabavki. Od navedenog broja, Parlamentarna skupština je provela 11 otvorenih postupaka u vrijednosti od 1.434.569 KM, 6 konkurentskih postupaka u vrijednosti od 163.543 KM i 2 postupka u skladu s Aneksom II u vrijednosti od 115.385 KM. Parlamentarna skupština je putem direktnih sporazuma izvršila nabavke u vrijednosti od 56.182 KM.

Revizijom procedura javnih nabavki iz uzorka utvrđena su odstupanja od zadanih kriterija kako slijedi:

**9.1. Nabavka namještaja**

Nabavka kancelarijskog namještaja je izvršena putem otvorenog postupka koji je sadržavao dva lota (Lot 1 – procijenjene vrijednosti 75.214 KM i Lot 2 – procijenjene vrijednosti 51.709 KM). Prema izvještaju o preuzimanju tenderske dokumentacije od strane ponuđača, istu je preuzelo 18 potencijalnih ponuđača, a izmijenjenu tendersku dokumentaciju je preuzelo 9 potencijalnih ponuđača. Ponudu je za oba Lota dostavio samo po 1 ponuđač i iste su ocijenjene kvalifikovanim. Sa izabranim ponuđačem je 26.12.2024. godine zaključen ugovor o nabavci namještaja za Lot 1 u vrijednosti od 69.682 KM i za Lot 2 u vrijednosti od 41.184 KM

Zakonom o javnim nabavkama definisano je da tehničke specifikacije moraju svim kandidatima/ponuđačima omogućiti jednak i nediskriminirajući pristup takmičenju. Uvidom u tehničku specifikaciju za nabavku namještaja za Lot 1 uočeni su pojedini zahtjevi po pitanju određene vrste namještaja koji su mogli uticati na ograničenje konkurencije, a koji po našem mišljenju nisu neophodni za redovan kancelarijski posao<sup>31</sup>.

Parlamentarna skupština je prije pokretanja procedure javne nabavke sastavila pisanu zabilješku o prethodnoj provjeri tržišta u kojoj je navedeno da su za Lot 1 dostavljene tri informativne ponude. Međutim, uvidom u iste konstatovali smo da je samo izabrani ponuđač dostavio kompletnu informativnu ponudu koja zadovoljava tražene karakteristike namještaja, a jedini je dostavio i ponudu u proceduri javne nabavke.

Navedeno upućuje na propuste prilikom izrade tehničke specifikacije za nabavku namještaja.

<sup>29</sup> Službeni glasnik BiH, broj 39/14, 59/22 i 50/24

<sup>30</sup> Podaci iz tabelarnih pregleda sačinjenih za potrebe revizije

<sup>31</sup> Opisne konstrukcije kao: „spoj nogu i ploče je zaobljen bez uglova“, „gornja ploča, donja ploča i leđa čine jedan komad u obliku slova C, bez vidljivih šavova“, „unutar komada se nalazi element sa 3 vrata i bokovima“, „baza je u obliku petokrake zvijezde“, „gornja ploča je smaknuta“, spoj stuba sa pločama je kao izliven“, „lučna drvena šipka koja 'gri' dio naslona i rukonaslona“.



Tokom godine izvršeno je usklađivanje budžeta koje se odnosi na sredstva višegodišnjeg kapitalnog ulaganja prenesena iz prethodne godine u iznosu od 1.203.622 KM.

Prema navedenom, Parlamentarna skupština je u 2024. godini raspolagala sredstvima u ukupnom iznosu od 25.283.622 KM.

Parlamentarna skupština je izvršila prestrukturisanje rashoda budžeta koje je odobrilo Ministarstvo finansija i trezora BiH. Prestrukturisanje rashoda je izvršeno u ukupnom iznosu od 225.000 KM.

U pregledu rashoda i izdataka po ekonomskim kategorijama – zbirno, u periodu od 1.1. do 31.12.2024. godine, ukupno ostvareni rashodi iskazani su u iznosu od 21.573.527 KM, što je za 3.710.095 KM manje u odnosu na raspoloživi (korigovani) budžet za 2024. godinu.

Vrijednosno značajni rashodi odnose se na: bruto plaće (14.340.761 KM)<sup>17</sup>, naknade troškova zaposlenih (2.366.529 KM), putne troškove (1.197.346 KM), ugovorene usluge (1.421.132 KM), nabavku opreme (1.201.553 KM) i tekuće grantove političkim strankama (531.829 KM).

**Pregled rashoda i izdataka iz budžeta prikazan je u Prilogu II Izvještaja.**

U daljem tekstu navodimo nalaze revizije.

#### **7.2.1. Bruto plaće**

**Plaćeno odsustvo:** Zakonom o radu u institucijama BiH<sup>18</sup> propisano je da zaposlenik ima pravo na odsustvo s rada uz naknadu plaće do sedam radnih dana u jednoj kalendarskoj godini – plaćeno odsustvo u slučaju: stupanja u brak, porođaja supruge i teže bolesti ili smrti člana užeg domaćinstva i zadovoljavanja vjerskih, odnosno tradicijskih potreba ili drugih slučajeva utvrđenih aktom poslodavca. Izuzetno, poslodavac je dužan da omogući zaposleniku odsustvo do šest radnih dana u jednoj kalendarskoj godini, radi zadovoljavanja njegovih vjerskih, odnosno tradicijskih ili drugih potreba, s tim da se odsustvo od dva dana koristi uz naknadu plaće – plaćeno odsustvo.

Ministarstvo pravde BiH je prethodnih godina, po zahtjevu određenih institucija, dalo mišljenje o načinu primjene navedenih odredbi<sup>19</sup>. Naime, u skladu sa mišljenjem Ministarstva, zaposleni ima pravo na odsustvo sa rada uz naknadu plaće na pet radnih dana u slučaju stupanja u brak, porođaja supruge i teže bolesti ili smrti člana užeg domaćinstva, a dva dana radi zadovoljavanja vjerskih odnosno tradicijskih ili drugih potreba utvrđenih aktom poslodavca.

Konstatovali smo da je Parlamentarna skupština svojim zaposlenim odobrivala korištenje do četiri dana plaćenog odsustva godišnje radi zadovoljenja vjerskih, odnosno tradicijskih potreba, a ne dva dana kako je propisano zakonom.

<sup>17</sup> Prosječan broj zaposlenih u 2024. godini za koje su isplaćene bruto plaće bio je 236

<sup>18</sup> Član 30. stav (1) Zakona o radu u institucijama BiH

<sup>19</sup> Mišljenje dostupno na Internet-stranici Ministarstva pravde BiH-Info/pristup informacijama – Pitanja u vezi s primjenom zakona i stavova

**PREPORUKA 2**

**Parlamentarna skupština je dužna da, prilikom odobravanja plaćanja odsustva zaposlenim, postupi u skladu sa Zakonom o radu u Institucijama BiH.**

**7.2.2. Izdaci za upotrebu vozila**

Ukupni izdaci za službena vozila sa 31.12.2024. godine iznose 186.288 KM, a značajniji izdaci odnose se na auto gume (15.568 KM), gorivo (86.947 KM), usluge opravki i održavanja vozila (49.957 KM) i osiguranje vozila (24.636 KM).

Internim pravilnicima<sup>20</sup> o korištenju službenih vozila, propisano je korištenje službenih vozila u Parlamentarnoj skupštini, kao i prava i obaveze vozača u vezi sa korištenjem te korištenje privatnog vozila u službene svrhe. Članovi kolegija oba doma i članovi kolegija Sekretarijata imaju pravo na stalno korištenje službenog vozila sa vozačem radi obavljanja poslova i zadataka iz nadležnosti Parlamentarne skupštine. Zaključno sa 31.12.2024. godine Parlamentarna skupština je imala na raspolaganju 19 vozila.

Internim pravilnikom je definisano da se za korištenje službenog vozila upotrebljava propisani obrazac putnog naloga za putničko motorno vozilo. Putni nalog za vozilo se izdaje za tekući mjesec za svako službeno vozilo pojedinačno i popunjava ga osoba koja upravlja vozilom sa svim podacima te odgovara za njihovu istinitost i tačnost. Definisano je i mjesečno vođenje evidencije potrošnje goriva, tekućeg održavanja i nabavke auto guma za svako vozilo te smo konstatovali da su mjesečne evidencije ažurne i u skladu sa internim pravilnikom.

Kontrolom naloga za službena vozila konstatovali smo da se odredbe internog pravilnika koje se odnose na popunjavanje naloga za vozila ne poštuju u potpunosti. Naime, kod pojedinih putnih naloga nisu popunjeni podaci relacije kretanja (upisuje se samo početna i krajnja mjesečna kilometraža), stanje kilometraže prilikom sipanja goriva, nedostaje potpis osoba koje su koristile vozila kao i potpis dobavljača prilikom sipanja goriva. Također smo uočili da su za pojedine relacije upisane veće kilometraže od stvarne za tu relaciju bez navođenja dodatnih obrazloženja za ove razlike.

**PREPORUKA 3**

**Parlamentarna skupština je dužna osigurati da se nabavka ulja i tečnosti za službena vozila vode u skladu sa internim pravilnikom u cilju osiguranja navedenih vozila od neželjenih sredstava.**

Nadalje, okvirnim sporazumom za nabavku nafte dobavljač se obavezao na nepromjenjivost ponuđenih cijena za pojedine artikle<sup>21</sup> tokom cijelog perioda, dok se cijena dizel goriva neće mijenjati ukoliko odstupanje ponuđene cijene od prosječne cijene jedne litre dizelskog goriva za mjesec u kojem je podnesena ponuda ne bude veće ili manje od 5%. Konstatovali smo da se fakturisane cijene razlikuju od ugovorenih te da dobavljač putem knjižne obavijesti odobrava

<sup>20</sup> Pravilnik o korištenju službenih vozila Parlamentarne skupštine BiH broj: 03/5-02-4-2421-1/16 od 30.05.2017. godine, Pravilnik o izmjenama i dopunama Pravilnika o korištenju službenih vozila Parlamentarne skupštine BiH broj: 03/5-02-4-2650-3/17 od 03.09.2018. godine i Pravilnik o dopunama Pravilnika o korištenju službenih vozila Parlamentarne skupštine BiH broj: 03/5-02-4-1258/23 od 07.06.2023. godine.

<sup>21</sup> Motorna ulja, AdBlue tečnost i tečnost za brisače.

**Tabela I: Spisak državnih službenika i zaposlenika u Sekretarijatu  
Parlamentarne skupštine Bosne i Hercegovine kojima su isplaćene naknade  
za period od 1. 1. 2023. godine do 1. 2. 2026. godine**

1. *Uputstvo za popunjavanje tabele: Potrebno je popuniti tabelu na način da se za svakog pojedinog državnog službenika ili zaposlenika, pored navedenog imena i prezimena, popuni šest predviđenih stavki koje se odnose na tog zaposlenog.  
Primjer naveden u tabeli.*
2. *Tabelu je potrebno popuniti na način da se na prvom rednom mjestu navedu podaci za zaposlenog koji je ostvario najveći iznos novčanih naknada i dalje redom, od najveće da najniže ukupne naknade.*

<b>Ime i prezime</b>	<b>Radno mjesto državnog službenika ili zaposlenika</b>	<b>Stimulacija za izvanredne rezultate i obavljanje poslova drugog radnog mjesta  Broj dodijeljenih stimulacija/ ukupno KM</b>	<b>Komisije za javne nabavke  Broj dodijeljenih stimulacija/ ukupno KM</b>	<b>Naknada za prekovremeni rad  Broj prekovremenih sati/ukupno KM</b>	<b>Stimulacija za rad u radnoj grupi/komisiji (prijem zaposlenika u radni odnos, interni oglas za državne službenike i sve druge radne grupe/komisije)  Broj komisija/ ukupno KM</b>	<b>Ukupan iznos svih novčanih naknada - ukupno KM</b>
Marko Marković	Stručni saradnik .....	8/250KM	8/150	60/450KM	8/1200	4850 KM

**Tabela II: Spisak državnih službenika i zaposlenika u Sekretarijatu  
Parlamentarne skupštine Bosne i Hercegovine kojima nije isplaćena nijedna  
KM za dodatni rad u radnim grupama i sl. za period od 1. 1. 2023. godine do 1. 2. 2026.**

<b>Ime i prezime</b>	<b>Radno mjesto državnog službenika ili zaposlenika</b>
Marko Marković	Stručni saradnik .....

**Tabela III: Spisak državnih službenika i zaposlenika u Sekretarijatu  
Parlamentarne skupštine Bosne i Hercegovine kojima je odobreno službeno  
putovanje u periodu od 1. 1. 2023. godine do 1. 2. 2026. godine  
(izuzev državnih službenika Sektora za međunarodne odnose i protokol)**

- Uputstvo za popunjavanje tabele: Potrebno je popuniti tabelu na način da se za svakog pojedinog državnog službenika, pored navedenog imena i prezimena, popuni šest predviđenih stavki koje se odnose na tog zaposlenog.  
Primjer naveden u tabeli.*
- Tabelu je potrebno popuniti na način da se na prvom rednom mjestu navedu podaci za zaposlenog za kojeg je PSBiH snosila najveće troškove i dalje redom, od najvećih do najnižih troškova.*

<b>Ime i prezime</b>	<b>Radno mjesto državnog službenika ili zaposlenika</b>	<b>Broj odobrenih službenih putovanja</b>	<b>Broj dana provedenih na službenom putovanju</b>	<b>Ukupan iznos isplaćenih dnevnica za sva službena putovanja- ukupno KM</b>	<b>Ukupan iznos koji je PSBiH platila za troškove prevoza, smještaja i ishrane za sva službena putovanja- ukupno KM</b>	<b>Ukupan iznos svih troškova za službena putovanja - ukupno KM</b>
Marko Marković	Stručni saradnik .....	8	20	800 KM	9800 KM	10600 KM



**Tabela V: Spisak državnih službenika i zaposlenika u Sekretarijatu Parlamentarne skupštine Bosne i Hercegovine (bez navođenja imena) kojima je odobreno 30 i više sati za privatni izlaz ili su 30 sati i više neopravdano izostali s posla (manjak radnih sati) u periodu od 1. 11. 2025. godine do 1. 2. 2026. godine**

- Uputstvo za popunjavanje tabele: Potrebno je popuniti tabelu na načina da se za svakog pojedinog državnog službenika ili zaposlenika, pored navedenog imena i prezimena, popuni pet predviđenih stavki koje se odnose na tog zaposlenog. Primjer naveden u tabeli.*
- Tabelu je potrebno popuniti na način da se na prvom rednom mjestu navedu podaci za zaposlenog koji je ostvario najveći broj izostanaka i dalje redom, od najvećeg da najmanjeg broja sati.*

<b>Ime i prezime</b>	<b>Radno mjesto državnog službenika ili zaposlenika</b>	<b>Broj odobrenih sati za privatni izlaz</b>	<b>Broj odobrenih sati za službeni izlaz</b>	<b>Broj sati za neopravdan izostanak s posla</b>	<b>Ukupan broj sati (privatno, službeno i neopravdano) - ukupno sati</b>
Marko Marković	Stručni saradnik .....	42	18	38	98

**NEAUTORIZIRANI TRANSKRIPT**  
**27. SJEDNICE PREDSTAVNIČKOG DOMA**  
**PARLAMENTARNE SKUPŠTINE BOSNE I HERCEGOVINE**  
**održane 15.04.2025. godine, sa početkom u 10:19 sati**

**PREDSJEDAVAJUĆI**  
**DENIS ZVIZDIĆ**

Uvažene dame i gospodo zastupnici, uvažena predsjedavajuća Vijeća ministara, poštovani članovi Vijeća ministara BiH, uvaženi gosti otvaram 27. sjednicu Predstavničkog doma Parlamentarne skupštine BiH, čućemo himnu Bosne i Hercegovine.

/INTONIRANJE HIMNE/

Još jednom srdačno pozdravljam sve prisutne zastupnice i zastupnike, uvažene članove Vijeća ministara i goste.

Dostavljeno je obavještenje da ministrica civilnih poslova Dubravka Bošnjak nije u mogućnosti prisustvovati sjednici. Iz Ureda zamjenika ministra vanjskih poslova dostavljeno je obavještenje da zamjenik Josip Brkić zbog unaprijed dogovorenih obaveza nije u mogućnosti prisustvovati sjednici, a odsustvo su opravdali zastupnici i zastupnica Aida Baručija i Šemsudin Dedić.

Konstatujem da sjednica ima kvorum za punopravan rad i odlučivanje.

Kao što vam je naznačeno u pozivu za sjednicu uz skladu s članom 167. Poslovnika na početku sjednice, a prije rasprave o dnevnom redu, zastupnicima će biti omogućeno postavljanje zastupničkih pitanja u usmenoj formi.

U skladu s članom 168. Poslovnika najave za postavljanje zastupničkih pitanja u usmenoj formi dostavili su sledeći, sledeće zastupnice i zastupnici: Rejhana Dervišević predsjedavajućoj Vijeća ministara BiH, Šemsudin Mehmedović ministru finansija i trezora BiH, Albin Muslić ministru financija i trezora BiH, Jasmin Emrić zamjeniku ministra sigurnosti BiH, Milan Petković ministru vanjskih poslova BiH i Safet Kešo ministru komunikacija i prometa BiH.

Ove najave su u skladu s članom 168. stav (2) Poslovnika dostavljene predsjedavajućoj Vijeća ministra i onom članu Vijeća ministara na kojeg se pitanje odnosi. Želim podsjetiti da je osiguran i direktan TV prijenos ovoga dijela sjednice, a u skladu s članom 167. Poslovnika Predstavničkog doma.

Sada možemo krenuti s postavljanjem usmenih zastupničkih pitanja i davanjem odgovora. Dakle, podsjećam pitanje dvije minute, odgovor dvije minute po potrebi i duži ako je riječ o nekoj bitnoj informaciji, komentar na odgovor jedna minuta.

- BiH i poboljšanja njihovih uslova rada, poboljšanja kvaliteta zraka te radi osiguranja ušteda u potrošnji energije, broj: 01-50-1-129/25 od 10.01.2025;
26. Davanje saglasnosti za ratifikaciju Okvirnog sporazuma o zajmu između Razvojne banke Vijeća Evrope i Bosne i Hercegovine za psihijatrijske klinike u Bosni i Hercegovini LD 2002 (2019), broj: 01,02-21-1-779/25 od 24.03.2025;
27. Davanje saglasnosti za ratifikaciju Ugovora o izmjenama i dopunama broj 1 na Ugovor o grantu od 26. oktobra 2020. u vezi s investicionim grantom iz Evropskog zajedničkog fonda za Zapadni Balkan za Projekat vodosnabdijevanja Gradačca između Bosne i Hercegovine i Evropske banke za obnovu i razvoj, broj: 01,02-21-1-788/25 od 25.03.2025.

Dobili ste dnevni red, ako želite možemo ga ponovo pročitati, a ako ne možemo, ne želite, ok, ako ne prelazimo na prvu tačku, to je,

**Ad. 1. Usvajanje zapisnika sa 26. sjednice redovne i 23. hitne sjednice Predstavničkog doma Parlamentarne skupštine BiH**

DENIS ZVIZDIĆ

Dobili ste te zapisnike, samo malo ekran da.  
Da li ima eventualno nekih primjedbi? Nema.

Otvaram raspravu.  
Niko se ne javlja za raspravu.

Prelazimo na tačku dnevnog reda broj dva,

**Ad. 2. Komentari na dobivene odgovore na zastupnička pitanja**

DENIS ZVIZDIĆ

U skladu s članom 170. Poslovnika do ove sjednice Doma pitanja i inicijative u pisanoj formi postavili su sledeći zastupnici: Sanja Vulić postavila je jedno pitanje i uputila inicijativu, Šemsudin Mehmedović postavio dva pitanja, Albin Muslić postavio pet pitanja, Saša Magazinović postavio tri pitanja, Ermina Salkičević-Dizdarević postavila tri pitanja, Aida Baručija postavila dvije grupe pitanja upućenih na 74 institucije BiH, Jasmin Emrić postavio jedno pitanje i uputio jednu inicijativu i po jedno pitanje dostavili su Šerif Špago i Safet Kešo.

Do današnje sjednice dostavljeni su sledeći odgovori: na pitanje Jasmina Emrića dostavljena su 33 odgovora, na pitanja Saše Magazinovića 22 odgovora, pitanje Šemsudina Mehmedovića četiri odgovora, na pitanje Safeta Keše dva odgovora, a po jedan odgovor dostavljen je na pitanja zastupnika Milana Dunovića, Rejhane Dervišević, Aide Baručije i Nermina Mandre.

Imamo li komentare na dobivene odgovore? Imamo.  
Molim vas da se držimo predviđenoga vremena.  
Zastupnik Milan Dunović, komentar na dobiveni odgovor. Izvolite.

DENIS ZVIZDIĆ

Zastupnik Predrag Kožul, izvolite.

PREDRAG KOŽUL

Najpre želim pozdraviti sve kolege i ostale na ovoj našoj sjednici.

Pa potaknut ovaj stalnom ovaj nastojanjima kolege Emrića i još nekih drugih kolega da utvrde nacionalnu strukturu uposlenih u institucijama BiH i ja sam postavio takvo pitanje Vijeću ministara i moram kazati dobio dosta detaljan odgovor. Pa ja ću u ovom svom komentaru dopuniti ono što je kolega Emrić selektivno iznio ovdje danas, dakle nije dobro selektivno iznositi podatke, pa ću ja dopuniti i neke drugim podacima koji se tiču nacionalne zastupljenosti Hrvata u nekim institucijama BiH uz napomenu da to činim nerado.

Dakle, Fonda za povratak BiH nula posto, nula zaposlenih, Ministarstvo za ljudska prava i izbjeglice 13%, Institut za mjeriteljstvo 5,26%, IDDEEA 13%, Direkcija za civilno zrakoplovstvo 5,88%, Agencija za osiguranje u BiH 8% i onda naročito zanimljive i važne i velike institucije koje se tiču pravosuđa Tužiteljstvo 13,3%, VSTV 11,3%, Sud BiH 12,8% i Ministarstvo sigurnosti ne značajno 14,5%. Moram kazati da ovako selektivno iznešeni podaci ne daju pravu sliku i nikad nisu dobri, kao što i podaci koje je iznio kolega prije toga ne daju pravu sliku i nisu vjerodostojni i dovoljno dobri. Najčešće se pojedinim od nas zamjera kada kolokvijalno rečemo prebrojavamo krvna zmca ovdje ili ondje i možda s pravom i zato ja pozivam kolege kada radimo ovaj posao da ga radimo cjelovito, argumentirano sa svim pokazateljima, da ne kažem šire gledano institucija BiH. Jer kad bih u ovu priču ja uključio famozni BH-Gas ili famoznu Federalnu upravu policije podaci bi zaista bili zanimljivi i bilo bi dosta argumenata da se o tome raspravi, ja sam sasvim siguran da ćemo i o tome na nadležnim institucijama raspravljati.

Zahvaljujem.

DENIS ZVIZDIĆ

Hvala najljepša.

Nemamo više prijavljenih za komentare na dobivene odgovore.

Prelazimo na tačku dnevnog reda broj tri,

**Ad. 3. Prijedlog zakona o izmjenama i dopuni Zakona o porezu na dodatu vrijednost, predlagač: Zajednička komisija za ekonomske reforme i razvoj Parlamentarne skupštine BiH, sa zahtjevom za razmatranje po hitnom postupku, u skladu s članom 133. Poslovnika, broj: 01,02-03/3-02-1-955/25 od 14.04.2025.**

DENIS ZVIZDIĆ

Otvaram raspravu sada o zahtjevu za hitni postupak i molim prijavljenu kolegicu Dizdarević da malo detaljnije obrazloži razloge, suštinu samoga Zakona i razloge zbog čega bi Zakon trebao biti usvojen po hitnom postupku.

Izvolite.

## Poslanička pitanja

Od početka VII. saziva (2014.) u zakonodavnoj bazi podataka e-z@k PSBiH formalno i sadržajno obrađuju se poslanička pitanja i odgovori.

Baza podataka e-z@k PSBiH korisnicima omogućava pristup:

- informaciji o poslaničkom pitanju (pristup cjelovitom tekstu poslaničkog pitanja postavljenom usmeno ili u pisanoj formi s poveznicom na odgovor, podatke o subjektu kojem je pitanje postavljeno kao i o subjektu koji je dostavio odgovor.

### Napomene:

- Tekst poslaničkog pitanja javno je dostupan nakon usvajanja zapisnika.
- Odgovori u pisanoj formi linkuju se na jeziku na kojem su dostavljeni.
- **Detaljne informacije o poslaničkim pitanjima postavljenim prije VII. saziva sastavni su dio pojedinačnih prikaza aktivnosti poslanika ranijih saziva.**

18.11.2025. **Predrag Kožul**

**01,02-50-11-19-1/24 18.11.2025.**

[\(/oquestion/ORQuestionDetails?contentId=4148\)](/oquestion/ORQuestionDetails?contentId=4148)

16.10.2025. **Predrag Kožul**

**01-50-1-1160/25 16.10.2025.**

[\(/oquestion/ORQuestionDetails?contentId=4115\)](/oquestion/ORQuestionDetails?contentId=4115)

16.05.2025. **Predrag Kožul**

**01-50-1-1160/25 16.5.2025.**

[\(/oquestion/ORQuestionDetails?contentId=3980\)](/oquestion/ORQuestionDetails?contentId=3980)

13.12.2023. **Predrag Kožul**

**01-50-1-2583/23 13.12.2023.**

[\(/oquestion/ORQuestionDetails?contentId=3532\)](/oquestion/ORQuestionDetails?contentId=3532)